

## O Mithra, parlami corsu

Ùn hè micca tutti i ghjorni ch'ella si face una scupertu cusi. Hè statu trovu in Mariana un locu di cultu à Mithra, una divinità antica. Forse puderà fà qualcosa pè a Corsica ?

Ùn ci hè micca ch'è u Sporting chi mubilizeghja u sabbatu. Stu 25 di ferraghju l'INRAP (Institut national de recherches archéologiques préventives) organizava una ghjurnata "porte aperte" nant'à u situ di Mariana, in Lucciana.



Ci vole à dì chì a scupertu d'un locu di cultu dedicatu à Mithra, un'antica divinità, hè stata spartuta assai in i media : **Corse-Matin, Corse Net Infos, Le Figaro, Le Point, La Croix, RFI...**

Per una volta, si parla in bè di a Corsica in tutti i media francesi. Mithra hà riesciutu un veru miràculu !

Ma perchè tuttu stu rimusciu ?

### Mariana, cità antica

Mariana era una culunia romana, fundata in 100 nanz'à Cristu. Dop'à a conquista di a Corsica, unepochi di terreni eranu dati à i veterani rumani.

Avà si parleria di "colonisation de peuplement".

Vicin'à u sboccu di Golu, a cità si sviluppa sin'à esse abandonata à u Medievu.



Hè à Geneviève Moracchini-Mazel ch'è no duvimu a più grande parte di ciò ch'è no cunniscimu di u situ anticu di Mariana. L'archeologa hà scavatu u situ trà u 1958 è u 1967, mettendu à palesu u cumplèssu paleocristianu, vicinu di A Canonica.



### Ma quale era stu Mithra ?

Natu à u primu seculu, u cultu di Mithra ci vene da luntanu. Hè d'origine indo-iraniana, hè si saria spartutu per via di i suldati rumani.

Si tratta d'un cultu monoteistu, vicinu di u cristianisimu. L'imperatore Teodosiu u pruibisce in l'annu 392.

Mithra hè rapresentatu cù un "cappellu frisgiu" ("bonnet phrygien") in traccia di tumbà un toru chì sanguineghja. Un cane è un serpu beienu stu sangue.

Eccu per esempiu una scultura di Mitra, ch'ellu si pò vede à u Louvre di Lens :



Eccu u bassu rilievu trovu in Mariana. Hè statu spaccatu (forse quandu u cultu hè statu pruibitu in l'Imperu rumanu ?).



### U "mithraeum"

Si chjama "mithraeum" u tempiu induv'ellu si pregava à Mithra. Ci hè un curridore centrale longu d'ondecu metri, è pusatoghji da i dui lati.

U cultu di Mithra si saria sviluppatu per via di i legunari rumani. Si ritrovanu parechji tempii in Roma è Ostia. Bella inserita ch'ella era in u mondu rumanu, a Corsica hè dunque stata anch'ella tocca da sta religione. Nunda d'anormale dunque.



À quandu d'altre scuperte ?

**Sta scuperta ferma eccezziunale è i scavi archeologhi sò troppu rari. Òn pudemu ch'è lagnacci ch'ellu ùn ci ne sia di più.**

**Speremu omancu chi una scuperta cum'è quessa ferà piglià cuscenza à l'opinione publica è à l'omi pulitichi chi sott'à i nostri pedi, a terra hè piena di tesori chi fermanu da truvà per capisce a nostra storia. È quessa, ùn hà nisun prezzu...**

Di più dettagli nant'à sta scuperta [nant'à u situ di l'INRAP](#)

**U 25 DI FARRAGHJU 2017**

Surghjente :  
<https://www.apiazetta.com>